

Z A K O N
O IMUNITETU BRČKO DISTRIKTA
BOSNE I HERCEGOVINE

U skladu sa članom 23 Statuta Brčko Distrikta Bosne i Hercegovine («Službeni glasnik Brčko Distrikta BiH» broj 01/00), Skupština Brčko Distrikta Bosne i Hercegovine na 54. sjednici održanoj 13. decembra 2002.godine, usvaja

ZAKON O IMUNITETU

Član 1 (Cilj zakona)

Ovaj zakon se donosi s ciljem da se zaštiti integritet zakonodavnih i izvršnih institucija Brčko Distrikta Bosne i Hercegovine (u daljem tekstu: Brčko Distrikt) putem utvrđivanja procedure prema kojoj se poslanici Skupštine Brčko Distrikta (u daljem tekstu: poslanici) mogu pozvati na imunitet od krivične ili građanske odgovornosti, a gradonačelnik Brčko Distrikta se može pozvati na imunitet od građanske odgovornosti.

Član 2 (Predmet i primjena zakona)

Ovim zakonom se utvrđuju lica koja imaju pravo da se pozovu na svoj imunitet u odbrani u krivičnom i parničnom postupku i propisuju se posebna pravila krivičnog i parničnog postupka po kojima su tužilaštvo, sudovi, kao i drugi učesnici u krivičnom i parničnom postupku dužni da postupaju u skladu sa ovim zakonom. Ni jedna odredba ovog zakona neće na bilo koji način biti u suprotnosti s postupcima ili nadležnošću Ustavnog suda Bosne i Hercegovine, kako to predviđa član VI Ustava Bosne i Hercegovine.

Član 3 (Lica koja imaju pravo na imunitet (isključenje od krivične i građanske odgovornosti))

Poslanici Skupštine neće biti krivično ili građanski odgovorni za bilo koju radnju izvršenu u okviru njihovih dužnosti u Skupštini.

Gradonačelnik neće biti građanski odgovoran za bilo koju radnju izvršenu u okviru njegovih dužnosti u Vladi Brčko Distrikta.

Član 4 (Trajanje i definicija imuniteta)

Lica iz člana 3 ovog zakona, mogu se pozvati na imunitet u rokovima i na način kako je to predviđeno zakonima kojima se uređuju krivični i parnični postupak, za radnje izvršene u okviru njihovih dužnosti u navedenim institucijama, ali se on ne može smatrati opštom preprekom za krivično gonjenje ili pokretanje parničnog postupka za radnje koje se ne odnose ili ne proizilaze direktno iz njihovih dužnosti.

U smislu ovog zakona "radnje izvršene u okviru njihovih dužnosti" podrazumijevaju radnje koje se odnose ili koje direktno proističu iz dužnosti koju poslanici imaju u Skupštini, odnosno gradonačelnik u Vladi Brčko Distrikta, kako je to utvrđeno u Statutu, zakonima i drugim propisima Brčko Distrikta.

Član 5 (Važeći zakoni)

Osim ako nije drugačije predviđeno ovim zakonom, krivični i parnični postupak protiv lica iz člana 3 ovog zakona vodi se prema važećem zakonu o krivičnom i zakonu o parničnom postupku.

Član 6 (Procedura u krivičnom postupku)

Ukoliko se u toku krivičnog postupka, lice iz stava 1 član 3 ovog zakona pozove na imunitet tvrdeći da je radnja, koja predstavlja osnov za pokretanje tog krivičnog postupka, izvršena u okviru njegovih dužnosti, prema definiciji iz člana 4 ovog zakona, o tom pitanju će raspraviti i odlučiti Apelacioni sud Brčko Distrikta. Standardna proceduralna pravila za rješavanje takvih pitanja propisuje Pravosudna komisija Brčko Distrikta.

Odluka Apelacionog suda je konačna i obavezujuća, a protiv nje se može uložiti žalba Ustavnom sudu Bosne i Hercegovine.

Član 7 (Procedura u parničnom postupku)

Ukoliko se u toku parničnog postupka, koji se vodi protiv lica iz člana 3 ovog zakona, to lice pozove na imunitet tvrdeći da je radnja koja predstavlja osnov za pokretanje tog

parničnog postupka izvršena u okviru njegovih dužnosti, prema definiciji iz člana 4 ovog zakona, o tom pitanju će raspraviti i odlučiti Apelacioni sud Brčko Distrikta. Standardna proceduralna pravila za rješavanje takvih pitanja propisuje Pravosudna komisija Brčko Distrikta.

Odluka Apelacionog suda je konačna i obavezujuća, a protiv nje se može uložiti žalba Ustavnom sudu Bosne i Hercegovine.

Član 8 (Stavljanje van snage)

Stupanjem na snagu ovoga zakona, prestaju da važe odredbe Zakona o izvršnoj vlasti Brčko Distrikta ("Službeni glasnik Brčko Distrikta" brojevi 5/01, 9/01, 12/01 i 16/01) i Poslovnika Skupštine ("Službeni glasnik Brčko Distrikta" broj 01/00) koje su u suprotnosti sa ovim zakonom, te se stavljaju van snage prethodne proceduralne zabrane krivičnog gonjenja ili pokretanja parničnog postupka protiv onih lica koja su inače imala pravo na imunitet. Takvo stavljanje van snage ne prejudicira pravo na odbranu u krivičnim i parničnim postupcima koje je ranije regulisano zakonom.

Član 9 (Stupanje na snagu i objavljivanje)

Ovaj zakon stupa na snagu 8. (osmog) dana od dana objavljivanja u Službenom glasniku Bosne i Hercegovine.

**Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA**

**Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA**

Broj: 0-02-022-326/02
Brčko, 13. decembar 2002. godine

**PREDSJEDNIK
SKUPŠTINE BRČKO DISTRIKTA**

Mirsad Đapo, dipl. pravnik

This document was created with Win2PDF available at <http://www.daneprairie.com>.
The unregistered version of Win2PDF is for evaluation or non-commercial use only.